

# **Акафист святому пророку и царю Давиду, Псалмопевцу**

*Празднование 13 января (31 декабря)*

## ***Кондак 1***

Избранный Богом на служение пророческое, подвигами твоими Творца и Господа прославивый, промысел благий о спасении рода человеческого явивый, святостию жития твоего просиявый; псалмы твоими хвалу Царю Небесному воздавый; похвальная восписуем ти, преславный царю Давиде. Ты же, яко имеяй дерзновение велие у Милосерднаго Господа, предстательством твоим небесным выну помогай нам, да зовем ти:

Радуйся, святе Давиде, богоизбранный Царю и всеславный пророче.

## ***Икос 1***

Ангелов Творец избра ты от колена Иудина и дома Иессева в цари народу своему и благодатию пророческою наполни ты, да воспоеши во псалмех величие, милосердие и премудрость Создателя нашего и промысла Его благаго о спасении нашем образ и обетование явиши. Мы же, дивящися таковому о тебе благоизволению Божиему, вопием ти сице:

Радуйся, избранниче Божий, присный о душах наших молитвенниче предивный. Радуйся, по Слову Вседержителя в прародители по плоти Сыну Божию приуготованный. Радуйся, Израиля ветхаго благословение. Радуйся, Церкви Христовой, Израиля

новаго, молитвенное предстательство. Радуйся, всех приходящих к тебе благодатию озаряющий. Радуйся, благия желания наша исполняющий. Радуйся, всякую печаль от нас удаляющий. Радуйся, всех чтущих память твою пред Богом поминающий. Радуйся, святе Давиде, богоизбранный Царю и всеславный пророче.

### ***Кондак 2***

Видя Премудрый Господь наш нечестия царя Саула, повеле пророку своему Самуилу пойти в дом отца твоего Иесея и помазати единого от осьми сынов его в новые царие Израильстии; тем же, святе Давиде, помазания елея от руки Провозвестника Божия восприявше, воспел еси Всемилостивому Богу нашему: Аллилуия.

### ***Икос 2***

Разумом богоблагодатным просвещен был еси, прехвальне Давиде, от юности твоея, яко закон Господень от пророка Моисея Израилю данный усердно исполнял еси, дни отрочества твоего во трудех и молитвах проводил еси, созерцая величие творения Божия, хвалу Создателю возносил еси. Мы же, воспевая ныне таковое благочестие и благоразумение твое, взываем ти сице:

Радуйся, от младенчества сердце твое Господеви предавай. Радуйся, от юности разум твой Божию премудростию напитавый. Радуйся, от созерцания творения ум твой ко Творцу возносивый. Радуйся, красоту и величие Божия творения воспевай. Радуйся, отцу земному доброчестно послуживый.

Радуйся, от дней отрочества твоего Царю Небесному угодивый. Радуйся, о чадах наших ко Господу теплое моление. Радуйся, родителей и наставников в благочестии утверждение.

Радуйся, святе Давиде, богоизбранный Царю и всеславный пророче.

### ***Кондак 3***

Сила и благодать Всесвятаго Духа чудесно помогаше ти, всехвальне Давиде, во всех благих начинаниях твоих; многое великое и славное даровано бысть тебе от Всемогущего Бога: дар песенный, высокие добродетели, земное величие и небесное увенчание, на враги и супостаты одоление, и любви велия народа к тебе; ты же за вся сия благодеяния воспевал еси Вседержителю: Аллилуия.

### ***Икос 3***

Имуще смущение велие от духа злаго воздвигаемое, Саул царь повеле отыскати мужа в игре на гуслех искуснаго, дабы оный умирил есть дух царев, благодати не имущий. Ты же, угодниче Божий, по повелению царевому стада своя оставил еси, в чертози царстии вселился еси и утешение игрою своею царю израильскому приносил еси. Мы же, таковое твое благочестие и искусство похваляюще, зовем ти таковая:

Радуйся, воле царя земнаго внявый и верно ему послуживый. Радуйся, скорби и недуги его душевныя благодатно исцелявший. Радуйся, послушанию истинному нас научаяй. Радуйся, духа злобы и буйства от нас удаляяй. Радуйся, страстьми

одержимых от погибели спасающий. Радуйся, от искушений бесовских и падений греховных избавляющий. Радуйся, сострадати страждующим нас научающий. Радуйся, теплотою любви твоея нас согревающий.

Радуйся, святе Давиде, богоизбранный Царю и всеславный пророче.

#### *Кондак 4*

Буря превеликаго нашествия филистимлянского потрясе землю Израильскую, обаче не возможе поколебати веры твоея, святе Давиде, во Всемогущего Господа. Тем же, верою велиею твоею укрепляем, не убоялся еси идти супротив Голиафа, грозного воеводы филистимлянского, и победивши онаго, возблагодарил еси Творца нашего. Людие же израильстии о победе твоей радующиеся, воспеша Богу: Аллилуия.

#### *Икос 4*

Слыша, премудре Давиде, от людей израильстих пение хвалебное: “Саул тысячи победы, Давид же десятки тысяч” смутился еси зело и в смирении сердца твоего гласом внутренним возносил еси хвалу Вседержителю. Мы же, победу твою, верою совершенную, и смирение твое восхваляюще, вопием ти сице:

Радуйся, все упование твое на Господа возлагавый.  
Радуйся, яко выну Господа пред собою зревый.  
Радуйся, земли своея мужественный защитителю.  
Радуйся, наветов вражиих мудрый разорителю.  
Радуйся, любовью и благодарением от народа твоего

почтенный. Радуйся, от сына царева, Ионафана благочестиваго, дружбою одаренный. Радуйся, от царя Саула, зависти ради, гонения претерпевый. Радуйся, от Господа сил венец за веру и благочестие приемый.

Радуйся, святе Давиде, богоизбранный Царю и всеславный пророче.

### ***Кондак 5***

Божественным Духом просветися сердце твое, святе Давиде, егда в гонении Сауловом супротив тебя воздвигнутом, многия скорби с кротостию и смирением притерпел еси, миролюбия и любви ко врагом своим преисполнился еси и все упование твое на всеблагаго Господа возложивши, непрестанно воспевал еси Вседержителю: Аллилуия.

### ***Икос 5***

Видя очами веры сердце Саулово супротив тебя всяческих зол исполненное, не возроптал еси, святе Давиде, на царя неразумнаго, но все упование свое на Господа Бога Твоего возлагая, невредим пребыл еси. Мы же, добродетели твоя высокия и велию веру твою похваляюще, зовем ти:

Радуйся, живой в помощи Вышняго, Десницею Его сохраняемый. Радуйся, крилами ангельскими на всех путех твоих ограждаемый. Радуйся, Богом вразумляемый и вспомощаемый. Радуйся, скорби и испытания в богатстве духа претерпевый. Радуйся, в терпении и смирении нас укрепляющий. Радуйся, друг друга тяготы носить нас научающий. Радуйся,

на милость Господню уповати наставляющий.  
Радуйся, за вся Творца благодарити подвизающий.  
Радуйся, святе Давиде, богоизбранный Царю и  
всеславный пророче.

### ***Кондак 6***

Проповедника добрых дел явил еси себе,  
богоблаженне пророче Давиде, ты бо ревнуя о чистоте  
веры, потщался еси труды многими лукавыя нравы и  
обычай нечестивых сынов исправить, боговедению и  
благочестию научал еси ближних твоих, паче же  
образом жития своего наставляя на путь спасения, да  
вопиют вси Спасителю Богу: Аллилуия.

### ***Икос 6***

Возсиял еси паче солнца не токмо земли  
израильстей, но и временам грядущим, егда во граде  
Хевроне при стечении дванадесяти колен израилевых  
помазан был еси на царство и славою велиею и  
обильным Божиим благословением преукрасился еси.  
Мы же, сему дивящися, воспеваем ти сице:

Радуйся, помазаниче Господень благоговейный.  
Радуйся, Богом на служение царское призванный.  
Радуйся, служение сие со страхом Божиим  
совершивый. Радуйся, могущество и славу державы  
твоя укрепивый. Радуйся, о благе народа попечение  
велие имевый. Радуйся, многия скорби за люди своя  
претерпевый. Радуйся, милостивый и кроткий  
повелителю. Радуйся, стран и народов христианских  
небесный покровителю.

Радуйся, святе Давиде, богоизбранный Царю и  
всеславный пророче.

## *Кондак 7*

Хотяй благочестно и праведно управляти народом израильским, разумел еси, яко не токмо путие державы твоея но и “сердце царевое в руце Господней есть”, во всем выну упование на Бога возлагал еси, ведая, яко токмо Богом “царие царствуют и правителие узаконяют правду”. Сего ради возвеличи ты Господь паче иных сынов израильских и сопричте к лику велиих святых Своих. Мы же, сия поминающе, вопием Прославльшему ты Господу: Аллилуия.

## *Икос 7*

Новаго Ноя, строителя спасения и созидателя царствия израильского, яви ты Господь, егда по воле Божией, собрал еси войско на гору Сионскую и град Иерусалим присовокупил еси к державе твоей. И бысть град сей стольным градом царствия твоего и со дней тех почила велия благодать Божия на месте сем. Мы же, тебе, царю боголюбивому, таковыя похвалы от усердия нашего приносим:

Радуйся, царю святой, выну волю Господню творивый. Радуйся, сосуде домостроительства Божия предивный. Радуйся, Богом званный на дела великия и преславныя. Радуйся, воине всечестный и воеводо доброхвальный. Радуйся, достойно поклонятися Творцу научающий. Радуйся, Бога любить и волю Его творити нас подвизающий. Радуйся, ходити в заповедех Господних наставляющий. Радуйся, от сетей вражиих верных избавляющий.

Радуйся, святе Давиде, богоизбранный Царю и всеславный пророче.

### *Кондак 8*

Странствие земное совершая, на Создателя упование твое возложил еси, аще и прикоснулся еси к скверне греховней, покаянием душу твою обновил и воскресил еси. Мы же молим тя, святе Давиде, молися и ныне Всещедрому Богу, да ниспошлет благодать покаяния всем заблудшим чадом Небеснаго Отца и от греха к отеческому дому востекших, сподобит купно с тобою во веки благодарственно пети Ему: Аллилуия.

### *Икос 8*

Весь исполнен бысть Духа Святаго пророк Нафан, егда пришедши в чертоги твоя, во гресех твоих тя обличил есть. Ты же, богодуховным его словесам внимая, горькими слезами твоими оплакал еси злыя деяния твоя, вопия: “Помилуй мя, Боже, по велицей милости Твоей и по множеству щедрот Твоих очисти беззаконие мое”. Господь, видя велие и совершенное покаяние твое, прости тя и дары благодати Своея паки ти возврати. Мы же, Господа нашего, дивнаго в милосердии Своем, славословим и тебе таковыя похвалы восписуем:

Радуйся, богоугодному покаянию нас премудро научающий. Радуйся, от пристрастий греховных нас исцеляющий. Радуйся, от похотей и страстей плотских нас отвращающий. Радуйся, в вере и благочестии нас утверждающий. Радуйся, кающихся грешников со Христом примиряющий. Радуйся,

приходящих к тебе от рабства диаволу  
свобождающий. Радуйся, дух любви к ближним в  
сердцах наших воскрешающий. Радуйся, милосердие  
Божие к нам приклоняющий.

Радуйся, святе Давиде, богоизбранный Царю и  
всеславный пророче.

### *Кондак 9*

Всем требующим помощи твоя усердно благотворил  
еси, царю святой, и зело милосердствовал еси о  
нищих и убогих, и никто же отхождаше от лица  
твоего неутешенным. Призри же и на нас, пророче  
преславный Давиде, благосердием твоим, и от ран  
греховных исцеление подаждь нам молитвами  
твоими, да благодарственно поем Господеви:  
Аллилуия.

### *Икос 9*

Вития многовещанная не возмогут по достойно  
воспеть подвиги и труды твоя, всехвальный пророче  
Божий Давиде, яже подъял еси славы Божия и  
нашего спасения ради: Божественною истиною  
просветил еси народ твой; град Иерусалим во  
исполнение грядущего Промысла Божиего воздвигл и  
преукрасил еси и собрание псалмов твоих оставил  
нам еси, ими же и мы ныне просвещаемы,  
благодарим тя за велия труды твоя и приносим ти  
похвалы сия:

Радуйся, о грядущем воплощении Христа  
возвестивый. Радуйся, об искупительных страданиях  
Его вещавый. Радуйся, сокровище премудрости чадом  
Божиим явивый. Радуйся, им род христианский во

истине Божественной утвердивый. Радуйся, в неизреченной славе Творца мира созерцающий. Радуйся, во благоухании святыни присно почивающий. Радуйся, о Спасении нашем Спасителя умоляющий. Радуйся, милость Богородицы к нам реклоняющий.

Радуйся, святе Давиде, богоизбранный Царю и всеславный пророче.

### *Кондак 10*

Спасение рода человеческого устрояя  
Всемилосердный Создатель наш возвести ти, святе  
Давиде, яко из дома твоего Мессия изыдет. Мы же,  
ведуще исполнение обетования сего, яко чрез  
Преблагословенную Богородицу и Приснодеву  
Марию, дщи твою, воплотился есть Спаситель наш, со  
умилением сердец во благодарении суще,  
Всеумудрому Богу воспеваем: Аллилуия.

### *Икос 10*

Стеною молитв твоих небесных, святой царю и  
пророче Давиде, сохрани и огради нас от искушений  
врага рода человеческого, ищущего вечной гибели  
нашей, вемы бо вемы, яко много может молитва твоя  
пред лицом Христа Бога нашего, Его же молити не  
престай о всех нас, с любовью тя почитающих и  
вопяющих:

Радуйся, с Богородицею Мариєю и Предтечею  
Иоаном у престола Христова вечно предстоящий.  
Радуйся, купно с праведными богоотцы Иоакимом и  
Анною славу Богу воспевающий. Радуйся, бедным  
отраду и вспоможение дарующий. Радуйся, богатых к

милосердию и благотворению подвизающий. Радуйся, от пристрастия к земным богатствам нас отвращающий. Радуйся, богатства нетленные искати нас побуждающий. Радуйся, нечистивых и душетленных обычаев неуклонный искоренителю. Радуйся, кротких и благих нравов благоискусный насадителю.

Радуйся, святе Давиде, богоизбранный Царю и всеславный пророче.

### *Кондак 11*

Пение всеумиленное приносим ти, царю и пророче Давиде. Ты же, со Ангельскими лики славу Божию воспевая, не забуди и нас недостойных, дабы и нам спасение душ наших улучивше, с тобою вкупе пети Богу: Аллилуия.

### *Икос 11*

Светозарный светильник души твоея имея выну горящим, за вся, иже ниспосла ти Господь, благодарил еси Создателя нашего, в испытаниях и печалях укрепившаго и милостию Своею обильно тя одарившаго. Тем же, и скорби старости твоея, неразумными сынами и поддаными твоими супротив тя воздвигнутыя, со смирением и упованием на Владыку всяческих претерпел еси. Ныне же молим тя, угодниче Божий, научи нас за вся Творца нашего благодарити и приими от нас славословия сия:

Радуйся, злато, в горниле скорбей очищенное.  
Радуйся, древо, при источниках вод насажденное.  
Радуйся, тленную славу земную ни во что же вменивый. Радуйся, волю свою всецело в волю Божию

предавый. Радуйся, от плевел ненависти сердца наша очищающий. Радуйся, светом любви нелицемерных нас озаряющий. Радуйся, от уныния и отчаяния нас избавляющий. Радуйся, от малодушия и маловерия нас исцеляющий.

Радуйся, святе Давиде, богоизбранный Царю и всеславный пророче.

### ***Кондак 12***

Благодатию Божиею укрепляем и подвизаем, путь жития земного совершив, святе Давиде, сном смертным почил еси и к Богу со упованием преставился еси, тем же святое усение твое славяще, молим тя, пророче святыи, егда же и мы сном смертным усыпати начнем, умоли Господа кротко душу нашу от тела отделить и бесовския власти ю избавити, спасения вечнаго нас удостоити, да зовем Господеви в радости святых: Аллилуия.

### ***Икос 12***

Поюще Богу песнь благодарения, радуемся о тебе, богоблаженне царю Давиде, яко вся полезная нам даруеши, тобою бо пагуба отгоняется, здравие улучается, мир и благостроение водворяется, понеже бо на небесех присно ходатайствуеши о нас, зывающих ти сице:

Радуйся, всех приходящих к тебе благодатию Божиею озаряющий. Радуйся, телес наших благодарованное врачевание. Радуйся, о душах наших благоприятное предстательство. Радуйся, молитвами твоими от напрасныя смерти нас избавляющий. Радуйся, труды наша на пути спасения облегчающий. Радуйся, ко

творению дел благих всех нас подвизающий. Радуйся, на земные скорби и печали наша призирающий. Радуйся, радости духовныя нас исполняющий. Радуйся, святе Давиде, богоизбранный Царю и всеславный пророче.

### ***Кондак 13***

О, святыи угодниче Божий, царю и пророче Давиде, прими малое сие моление наше, от любви душевныя тебе возносимое и умоли Всеблагаго и Всемиловитаго Творца нашего избавити нас от всякаго зла и напасти, да благочестно в вещи нынешнем проживем и блаженство живота вечнаго молитвами твоими обрящем, о тебе благодарственно воспевающе Господеви: Аллилуия. Аллилуия. Аллилуия.

*Сей кондак читается трижды, затем икос 1 и кондак 1.*

### ***Молитва первая***

О святыи угодниче Божий, царю и пророче Давиде! Подвигом добрым подвизався на земли, восприял еси на Небесех венец правды, егоже уготовал есть Господь всем любящим Его. Темже взирающе на святыи твой образ, радуемся о преславнем скончании жительства твоего и чтим святую память твою. Ты же, предстоя Престолу Божию, прими моления наша и ко Всемиловитому Богу принеси, о еже простити нам всякое прегрешение и помощи нам стати противу кознем диавольским, да избавльшися от скорбей, болезней, бед и напастей и всякаго зла, благочестно и праведно проживем в нынешнем веке и сподобимся предстательством твоим, аще и недостойни есмы,

видети благая на земли живых, славяще Единого во святых Своих славимаго Бога, Отца и Сына и Святаго Духа, ныне и во веки веков. Аминь.

***Молитва вторая***

Помяни, Господи, царя Давида и всю кротость его, и святыми того молитвами помилуй нас, грешных. Аминь.

*Автор акафиста Евгений Храповицкий  
Благословлено для келейного чтения*